

دارالفنون

چاپخانه دارالفنون

مقوق ، اقتصادیات

ایکی آیه بر نشر اولنور

مندرجات

قسم مقوق :

تورك - رومهن محكمه حكيمه سنده کی حادثه جدیده
 حقوق اصول محاكمه سی درس لری
 قایدتولاسیونلر
 مصطفی رشید
 احمد رشید

قسم اقتصادی :

بولشه ویزمك كیزلی اساس لری
 عینی زاده حسن تحسین
 بوسنه لوزان صاجی ییل دونوی بویوك مراسله تسعید ابدلی

حقوق فاکولته سنده 1928 سنه سی تعطیل دوره سنده تقریر اولونان

حقوق اصول احکام کی درسی

برنجی درس : مدخل

1- جمعاً آلتی ساعتدن عبارت اوله جق درس مزده یکی اصول محاکمه قانوننک هیئت عمومی سه سنه بر نظر عطف ایده جکر. بیان حاجت یوقدر که بوقدر قیصه بر زمانده یکی قانوننک بالجمله احکامی، سطحی صورتده اولسه بیله، کوزدن کچیرمک امکانی یوقدر. مخاطب لریمه فائده لی اوله بیلیمک ایچون تطبیقاتده اک زیاده علاقه کوسترلین واحکام سابقه دن اک چوق آریلان، بیلنمی الزم اولان اساسلر اوزرنده توقف ایده جکم.

2- یکی اصول محاکمه قانوننک عمومی اساسلری ایضاحه باشلامدن اول بوقانوننک نشرینه سائق اولان سبیلری ونصل حاضر لاندینی خاطر لایتمق ایسترم.

یکی اصول محاکمه قانوننک نشرندن اول، موقع مرعیتده اولان اصول محاکمه قانوننک، فرانسه قانونندن مترجم اصول محاکمه تجارت نظامنامه سی اساسی اتخاذ اولونارک تنظیم ایدیش ایدی. بناء علیه آنا خطلری اعتباریه فرانسه نك 1806 اصول محاکمه سه مطابقدر. فقط تفرعاته عائد بعض حکملرنده احکام فقهیه دن استفاده اولمش ایدی.

بوقانون، فرانسه قانوننک تام بر ترجمه سی دکل ایدی. اصول محاکمه اعتباریه پک لازمی اولان بر چوق حکملر، آلتماش ایدی. دیگر طرفدن مجله نك اقراره، دعوايه، بیناته، تحلیف وقضایه مخصوص کتابلرنده اصول محاکمه به متدائر پک چوق حکملر وضع ایدیش ایدی. کرك مجله ده وکرك اصول محاکمه ده موجود اولمایان بر چوق احکام ده زیاده فقهانک رایلرندن ملهم اولان اجتهادلر ایله اکمال اولمقده ایدی.

تطبیقاتده اصول محاکمه لردن شکایت زیاده ایدی. مشروطیتی متعاقب، نجم الدین منلا بکک عدلیه نظارتی زماننده اصول محاکمه نك بر چوق ماده لرینی تعدیل ایتک اوزره ذیل

اصول محاكمه قانونى نشر اولوندى. بوبك مهم برترقى ايدى. اصول محاكمه يي اولدجه يكيلشدير. سيوردى. فقط مجله نك شهاهه ، يمنه ، اقراره ، دعوايه دائر اولان حكملىرنده تعديلاته جسارت اولونا ميوردى. متفرق حكملىرو اجتهادلىر ايله وجود بولان تطبيقى اصول محاكمه من ايني بر اصول محاكمه قانونىك اوصافى حائز دكلدى. ايني بر اصول محاكمه قانونى ، سرعتله ، ازمصرفله ، امنيتله دعوالرك رؤيتنى تأمين ايتك لازمدر. دعوالرك كافى برسرعتله رؤيت ايديله مزسه ، چوق كره حق صاحبلىرى محكمه يه مراجعتدن فراغت ايتك مجبوريتنده قالير. كذلك دعوالرك تحقيق وحلى بك چوق مصرفلى انتاج ايدهرسه محاكمه مراجعتده تردد اولونور. حقسنز چيقان طرف ، بعضاً حسن نيت صاحبيدر. بعضاًده حقلى برادعا ، دليلك فقدانندن دولايى قايب اولور. بوكي حاللرده فضله مصارفه دهامشكلات ايله تحمل اولونور. بوندن باشقه ايني بر اصول محاكمه حقسنز بر ادعا مدافعه نك قازانماسى ، حق اظهار ايجونده دعوا جيلره تأمينات ويرمليدر. چابوق اولاجق ديه لايقيه تنور ايتمندن ، طرفينك نقطه نظرى اكلا شيلماندن بر دعوانك حل وانتاجى جائز اولاماز. بوسورتده اصول محاكمه ، حقك ، عدالتك دكل حقسنز لك بولى اولور. شبهه يوق كه حقلى اولان بر دعوا يي غائب ايتك بونى كچ قزانمقندن چوق فنادر. بالخاصه خصملىر بر برينك بوش بولنمانسندن ، آنى اولارق و كيلر يني تدارك ايدهر مامسندن استفاده ايتامليدر. هر كس حقندن امين اولمادجه مملكتده اقتصادى انكشاف لايقى وجهله اولماز بناءً عليه اصول محاكمه حقسنز ادعائك قزانناماسى ايجون چوق ، بك چوق تأمينات ويرملى ومعتدل بر بطائت احداث ايتمليدر. تجربه ايله ثابتدر كه ، چوق كره زمان حقلى طرف لهنه چاليشير .

حكومت مليه نك تأسسى اوزرينه قانونلر يئمزى يكيلشدير مك لزومى تقدير اولوندى . استانبولده بو مقصدله تشكيل اولنان قوميسيونلرندن بر ييسى يكي اصول محاكمه لايحه سنى احضاره مأمور ايدلدى .

عدليه وكلى نجاتى بك افندى ، يكي اصول محاكمه لايحه سنك احضارى اوزون زمانه متوقف اولديغى واصول محاكمه لرك وبالخاصه مجله نك بينانه متدائر حكملىرينك بر چوق حقسنز قلقره سببيت ويرديكى نظر دفته آلهرق بو حقسنز قلقرلرك اوكنه كچمك اوزره اصول محاكمه لرده موقتاً ياپياماسى اقتضا ايدهن بو تعديلاتى تثبيت مقصديله آنقرده بر قوميسيون مخصوص تشكيل ايدلدى . قوميسيون تسريع محاكمات قانونى لايحه سى نامى ايله اصول محاكمه ده بر خيلى تعديلات تكليف ايدلدى . عنوانى

بالاخره « اصول محاکمات حقوقیه و جزائیه و صلح و اجرا قانونک بعض ماده لرینی معدل قانون » صورتنده تعدیل اولونان بولایحه اصول محاکمه لرده و مجله نك بینانه دائر حکم لرنده مهم تعدیلات یاپیوردی . فقط چوق مفید اولان بوتعدیلات ، کافی اولمادیغندن استانبولده تشکیل ایدیلن اصول حقوقیه قومیسوننه یکی اصول محاکمه لایحه سفی تنظیمه دوام ایچون امر ویرلدی . قومیسون ، بدایتده مملکتک احتیاجلریله متناسب بر قانون یایم سفی دوشونمش و اوصورتله مساعیسنه دوام ایتمش ایدی . بو اصولک محذوری یواش یواش اکلاشیلیمغه باشلانیدی . مناقشه لر لزومندن فضله وقت آلدیغندن اجتهاد طریقله قانونک تنظیمی پک اوزون زمانه متوقف اولدینی کورلدی . دیگر طرفدن عدلیه وکیلی محمود اسعدبک افندینک بیانلری وجهله احتیاج مملکتی تثبیت ایچون آلدی بر « قسطاس » یوق ایدی . بوتون احتیاجلر اعضالرك ذاتی تجربه لرینه کوره تعیین اولونویور ایدی . فی الحقیقه حقیقی احتیاجلری تعیین ایچون علمی بعض اصولره مراجعت اولنق از جمله منتظم ایستاتستیکلر تنظیم اولونارق حادثه لر ، وقعه لر ، بونلرك سبیلری علم کوزلکلیله تدقیق ایدلدکن صوکر ا عمومی قاعده لر چیقاریلق لازمدر . قالدیکه بوکون دولتلر ، کندی ملی تجربه لرندن استفاده ایله اکتفا ایتمیورلر . اجنبی مملکتلرینک تجربه لرندن ده پک چوق استفاده ایدیورلر . برحاله که هر دولت ، کیتدکجه قومشوسنک قانونلرندن اقتباس احکام ایتمکده بو صورتله اخلاق ، عادت کبی حقوق ده بین الملل بر شکل المغه استمداد کوسترمکده دره بناء علیه ترجمه صورتیله قانونلری تدوین بوکون ایچون هم ده ا سهل و هم ده ده ا امیندر . عدلیه وکالتی اولا قانون مدنی یی اسویچره قانونندن ترجمه ایتدیوردی .

بونک نتیجه سی اولارق ده یکی اصول محاکمه قانونک اسویچره اصول محاکمه لرندن آلمسی ضرورت کسب ایتدی . بعضیلر اساس قانونلرینک مملکتی اولمادیغنی بالعکس اصول قانونلرینک بر مملکتی اولدیفنی وبناء علیه اصول محاکمه نك ترجمه طریقله تنظیم ایدیلیمه رك مملکتک اعتیاد ، احتیاجلری نظر دفته آله رق تنظیم ایدلمسی مطالعه سنده بولنشلر ایدی . حالبوکه اجنبی قانونلرندن استفاده نقطه نظرندن اصول محاکمه قانونلری ایله اساس قانونلرینی تفریق دوغرو اولاماز . چونکه ، اخلاق ، ایله اك آز مناسبتی اولان بر قانون وار ایسه اوده اصول محاکمه در . اجنبی حکومتلرك هر برنده اصول محاکمه ایچون سرعت ، امنیت ، مصارفده تصرف اساسلری قاعده اتخاذ اولنمقده ، طرفینک

اوزاتقی ، قاریشدرمق ایچون استعمال ایدیه بیله جکی حیلله ره ، تزویرلره مانع احکام دوشونلکده در . بناء علیه هر قانون ، یک حق اولارق دیگر دولتلرک قانونلرندن ، تجربه لرندن استفاده و اونک محذورلرینی ، نقصانلرینی تصحیحه چالیشمقده در . بناء علیه علمی اصول محاکمه قاعده لرینی تأسیسی دوشن مملکتیز ایچون اعتماد ایدیه بیله جک بر اجنبی قانونتی حرفیاً ترجمه ایتک بویوک بر ضرورت ایدی .

بالکزی ایکی نقطه ده اصول محاکمه قانونی ، مملکتک احوال خصوصیه سنی دوشونمک مجبوریتنده در . اولاً مملکتک تشکیلات محاکم قانونلرینی نظر دفته آلمالیدر . بو محاکم تشکیلاتی بر برینه اویمایان دولتلرک ، اصول محاکمه لریده بر برندن بر درجه فرقلی اولاجقددر . نانیاً مدتلر بالطبع مملکتک وسائط نقلیه سنه کوره فرقلی اولاجقددر .

بناء علیه بوقیود احترازیه داخلنده اصول قانونلری ده ، اساس قانونلری کبی بین الملل بر شکل آلفه استعداد کوستریور .

اصول محاکمه قانونمیزک ترجمه صورتیه تدوینه دیگر بر سبب ده کوستره بیلیر :

عدلیه و کیلی محمود اسعدیک افندی نک باش وکالته تقدیم ایتدیکی اسباب موجب لایحه سنده کی افاده لری وجهله ، حقوق مدنیه ساحه سنده کی اختلاف و نزاعلرک حل و فصل اصوللرینی تنظیم ایدن قانون ، اوحقوقی انکشاف و اظهار ایله وظیفه دار اولدیغندن اونلره متناظر بولمق و اونلری دائماً کوز اوکنده طوتمق مجبوریتنده در . ترجمه ایدیلن یکی قانون مدنی بی بوتون ایجه لکلریله آکلادقندن صوکرایی باشدن تدوین صورتیه بر اصول لایحه سنی وجوده کتیرمک سنه لره توقف ایدیه جک ایدی . بوصورتله یکی قانون مدینک فائده لی نتیجه لری اوزون زمان الده ایدیه میه جک ایدی .

بناء علیه استانبول قومیسونی ، عدلیه وکالتندن تلقی ایتدیکی امر اوزرینه ، اسویچره اصول محاکمه لرندن برینی مساعیسنه اساس اتخاذا ایتک مجبوریتنده بولوندی .

نوشاتلده استیناف محاکمی بولنمادیغنی و بزده ایسه حالاً استیناف تشکیلاتی یابیلایمیه جفی نظر دفته آلان قومیسون اعضالری نوشتاتل قانونی لایحه یه اساس اتخاذا ایتمکده متفق قالدی . آنجق آلمان و فرانسه قانونلرندن بعض حکملر استنباطنی ده ضروری و فائده لی عد ایتدی . از جمله صلاحیت و تبلیغات فصللری ده ازیاده آلمان قانونندن اقتباس ایدلمشدر . فی الحقیقه بومسئله لر

قانون مدنی ایله علاقه دار دکلدر . مملکتتمزك وسعتی ، اقتصادی وضعیتی اعتباریله آلمان قانوننك حکم لری قومیسون اعضا لری نه دهاملایم کلمشدر . آنجق ، قانون مدنی ، بینه مسئله سنده اسویچره قانون مدنیسی احکامنی عیناً قبول ایتمه یه رک فرانسه حقوقنده اولدینی کی بعض معاملاتك هر حالده سندله اثبات ایدلمسی اساسنی محافظه ایتدی . بناء علیه اصول محاکمه لایحه سنده بواساسك محافظه سی ضروری اولدیغندن فرانسه قانونندن ده بعض احکام آلمشدر .

بوصورتله احضار ایدیان لایحه عدلیه وکالتی طرفندن تدقیق ایدلمش و بویوک ملت مجلسی عدلیه انجمنی طرفندن مملکتك احتیاجنه اویغون کلمسی ملاحظه سیله بر درجه تعدیل ایدلمشدر . بونکله برابر اصول محاکمه قانوننك حین اقتباسنده ، و کرک طبعنده ضروری بعض سهولر اولما دینی ده ادعا ایدیه مز . مشهور فرانسیز پروفیسوری Planiol ، Taaité de droit civil اثرنده (10 نچی 1926 طبعی 1 نچی جلد صحیفه : 90) نده قانون ، واضح اولدینی حالده بیله ، اگر واضع قانون ، مقصدینی یا کلیش افاده ایتمش ، خطا ایتش ایسه بینه قانونك محتاج تفسیر اولدینی و فرانسه حقوقنده بوقیل مهم بعض یا کلیش لقلرک یا پیلدینی و بالخاصه تعریفات یا کلیش لقلرینك چو قجه اولدینی ذکر ایتدکن صو کرا بو یا کلیش تعریف لک ، علمه مطابق بر صورتده تفسیر ایدلمسی لازم کله جکنی چونکه « قانونده یازیلی اولسه بیله ، علمی حقیقت لک بشری خطا لک فوقنده اولدینی » بیان ایتمکده در . اصول محاکمه قانونمزی تفسیر ایده رکن ، بومشهور پروفیسورک فورموله ایتدیکی قاعده یی دائماً نظرده طوتمالی بز .

لایحه ده هر ماده آلتنده هانکی قانونك هانکی ماده سندن آلتدینی کوسترلشدر . بویوک ملت مجلسی ، صراحت و آشکاری اولارق تعدیل ایتدیکی احکام مستثنا اولمق اوزه لایحه یی ، اصلی اولان قانونه مطابقتنی نظر دفته آله رق قبول ایتشدر . حتی عدلیه انجمنی حجز احتیاطی فصلنده کی برایی ماده ده اولدینی کی نظر دقتنی جلب ایتدیکی ترجمه خطا لرینی اصلنه کوره تصحیح ایتمش و کیفیتی اسباب موجب مضبوطه سنده تصریح ایتشدر .

بناء علیه واضع قانونك ، اسباب موجب مضبوطه سنده اظهار ایتدیکی ارزو نظر دفته آله رق قانونی استهداف ایتدیکی مقصده واصلنه کوره تفسیر ایتلیدر .

* *

قضا

4 — قضا ، دار معناسنده ، نزاعی حل ایتمکدر . علی العموم نزاع لری فصل ایتک اوزره محکمه لر تشکیل اولمشدر . محکمه لک اساس وظیفه سی قضا در . فقط دنیا نك هر

طرفه تاریخی سبیلر بقاء، و عملی لزوم و فائده سی نظر دفته آله رق حا کملره قضا وظیفه سندن باشقه، بر نزاعک حل ایله علاقه دار اولمایان بر جوق مسائله ده اطاعتی واجب قرارلر اتخاذ ایده بیلیمک صلاحیتی ویرلمشدر.

زمان قدیمده تفریق قوا نظریه سی معلوم اولمادیغندن تشریع، اجرا، عدلیه قوتلری یکدیگرینه قارشمش ایدی. حاکم هر هم نزاعی فصل ایتمک و هم ده مهم اداری قرارلری اتخاذ ایده بیلیمک صلاحیتی حائز ایدیلر.

بوکونده تفریق قوا اساسی قبول ایدن قانونلر، بعض کره نظری اولارق بر قوته عائد اولمسی ایجاب ایدن بر خصوصی لزوم ویا فائده سنه بقاء دیگر قوتک صلاحیتی داخلنده عد ایتمکده درلر.

از جمله کرک تورک و کرک فرانسه کی بعض اجنبی تشکیلات اساسیه قانونلری قانون ماهیتده اولمایان، بعض قرارلرک اتخاذینی قوه تشریعه نک صلاحیتی داخلنده عد ایتمشدر.

بونک کی قوه عدلیه یه ده بعض اداری قرارلر اتخاذی وظیفه سی تحمیل اولونابیلیر. زیرا عدلیه محکمه لری، وظیفه اصلیه لری اعتباریه حقوق خصوصیه نک تطبیقاتنده ممارسه اکتساب ایده درلر. بوکی مسئله لری الک ایی قاورایان عدلیه حاکم لیدر. بقاء علیه قانون مدنی، حاکم لره نزاعی حل ایتمکدن عبارت اساسی ویا شلیجه وظیفه لرندن ماعداء، اداری ماهیتده بر جوق مسائله اتخاذ قرار صلاحیتی ویرسیور. حاکم لرک حلنه مأمور و مأذون اولدینی بوتون بو مسائل بوراده تعداد ایده میز. مثال قیلندن اوله رق غائبک قراری اعلانی، وصی تعیین، وصی به مأذونیت، صاحبسز ویا صاحب مجهول ماللرک اداره سی، احاله قطعیه، جزو فروخته قرار، قاری قوجا آراسنده اوله نمه مقاوله سنک تصدیق، اولاد آلفه مساعد، و بعض اشیانک مفردات دفترلرینک رسماً تنظیمی، ترک نک رسماً تصفییه سی ذکر ایده لم: بونلر هپ، حاکم لره اداری وظیفه لری آراسنده در. تفصیلات ایچون یکی حقوق اصول محاکمه لری قانونی شرحه مدخل اثریمزه مراجعت.

۵ — حاکم لره بوا یکی نوع وظیفه لرینی لایقینه تفریق ایتملیدر. چونکه اختلافسز، نزاعسز مسائله حاکم لره مداخله ایله اتخاذ قرار ایده بیلیمه لری ایچون قانونک بر نص صریحنه لزوم وارد. بالعکس نزاعلری حل ایتمک حاکم وظیفه اساسیه سنه داخل اولدیغندن بونک ایچون

بر ماده صریحه احتیاج یوقدر . قانون منع ایتدکجه هر نوع و ماهیته اولان نزاعلی
حاکم حل وفصل ایده بیلر .

دیگر طرفدن اصول محاکمه نك احکام عمومیه سی آنجق نزاعلی مسائلده قابل تطبیقدر .
نزاعسز مسائلده آنجق ، قیاس طریقله بو حکملر تطبیق اولونابیلر . بوکی مسئلهلر ده
زیاده اصول محاکمه نك 507 نجی ماده سنك B فقره سنه توفیقاً بسیط اصول محاکمه یه
تابعدر . بوققرده موضوع بحث « محاکمه خارجنده قرار ویرلمسی لازم کلن مسئلهلر » دن
مقصد نزاعسز ، اداری ماهیته کی مسائلدر .

بوماده لرده کی دعوا ، طرفین تعبیرلری یکلشددر . نوشتاتل قانوننده بوکلر یوقدر .
طرفین یرینه علاقه دار دعوا یرینه ده ایش تعبیرلرینی اقامه ایتك مناسب اولور . بسیط اصول
محاکمه ، اختلافسز مسائلك تدقیقنده قابل تطبیق اولدینی قانوناً تصریح ایدیلن بعض
اختلافلی مسائلده ویا اختلافلی مسئله مرتبط اولان اختلافسز دیگر بعض مسائلده قابل
تطبیقدر . از جمله تمهیر اثناسنده ، بونك لزوم یاعدم لزومندن متولد اختلاف بسیط اصول
محاکمه ایله حل اولونور . 565

دیگر طرفدن قضیه محکمه و طرق قانونیه به مراجعت اعتباریلده ایکی نوع قرارلر
آراسنده فرق واردر . حاکمك نزاعسز مسائلی حل ایدن قراری قضیه محکمه تشکیل
ایده مز . حاکم معقول سیلره بناءً دائماً قرارندن رجوع ایده بیلر . بالعکس حاکم ، بر نزاعی حل
ایدن قرارندن رجوع حقنی حائز دکلدر . طریق مراجعت کلنجه : قانون نزاعسز بعض
مسائلده ایکی درجه تدقیق اصولی قبول ایتکده در . از جمله وصایته متعلق مسائلده صالح
محکمه سنك قرارلرینه قارشی محکمه اصلیه به مراجعت اولونابیلر . فقط علی العموم نزاعسز
مسائلی حل ایدن قرارلره قارشی تمیزه مراجعت بر مسئله در که بوراده مناقشه ایده میز .
آنجق محقق اولان بر نقطه واردر که نزاعسز مسائلده اتخاذ اولنان قراردن متضرر اولان
کیمسه ، چوق کره ، حقوقی محافظه ایچون اقامه دعوا ایده بیلر . بوحالده اصول محاکمه
عادیه احکامی تطبیق اولونور . مثلاً حاکم ، بر کیمسه بی عقل خسته لغنه بناءً حجر ایتسه
بو کیمسه اعتراض ایده رك حجرك معتبر اولمادیقنی ادعا ایده بیلر . بوصورته اتخاذ اولوناجق
قرارك قابل تمیز اولدینی شهه سزدر .

اصول محاکمه نك دوقوزنجی بانك عنوانی اختلافسز مسائلده قضا اولدینی حالده ،
بر تحریر ذهولی اولارق متن قانونه کچمه مشدر .

زاعلی مسائل نزعہ مسائلدن تفریق ایتک قولای برشی دکلدن . بعض مسائلک
زاعلی بالعکس بعضیلک نزعہ اولدینی محقق اولسه بیلہ ایکسی اورتہ سندہ ۴۰م برچوق
مسائل واردرکہ زاعلی ویا نزعہ مسائلدن هانکیسی آراسنده تصذیف ایدیلہ جکندہ
اک معروف مؤلفلر بیلہ تردد ایتشلردن . بو ایکی نوع قضانک فارق وصفلرینی تعین
خصوصنده مؤلفلر متحد دکلدن . تفصیلات ایچون یکی حقوق اصول محاکملری قانونی
شرحہ عمومی مدخل اتریمزه مراجعت صحیفه ؛ 19 و متعاقب .

*
* *

ماکک صلاحیتی

6- اسکی اصول محاکمه قانونمزدہ حاکمک نزاعی نه صورتله تدقیق وحل ایدہ جکی
وبالخاصہ دعوائی نه وقت ونه شرائط داخلندہ ثابت عد ایدہ جکی خصوصنده لزومندن
فضله قطعی قاعدہلر وار ایدی . بوقاعدہلردن انحراف جائز اوله ماز ایدی . اصول محاکمه
مدتلری قطعی عد ایدیور وحا کمه بونلری اوزاتمق ، وقیصالتیق خصوصنده ، پک اندر
استنالردن قطع النظر (مواد مستعجلده جلب مدتی قیصالتیق کبی) صلاحیت ویرمیور
ایدی . یالکیز تطبیقاتده حس اولنان لزوم وضرورتہ بناءً حاکملر مدتلری آزالتیور ویا
اوزاتیورلردی . بعضاً مدتلرک مکرراً تمذید ایدلدیکی ده واقع ایدی . خلاصه ، حاکمک ،
دعوائی اداره ، تحقیق ورؤیت خصوصنده فعلاً صاحب اولدینی صلاحیت بعضاً پک
محدود وبعضاًده لزومندن فضله واسع ایدی .

دعوالرک تحقیق ورؤیتی خصوصنده رعایتی صورت قطعیده واجب واصلا انحراف
جائز اولمایان بعض قاعدہلر وضع ایدلمک ضروریدر . زیرا ، اصول محاکمه صنعتی ،
حقلی بی حقسنزدن تفریق ایچون فنی ، علمی اساسلر آرامقله مشغولدر .
حاکملرک عندی تقدیرلر ایله بواساسلری برطرف ایتلری حالنده حقلک لهنه تأمینات
موجود اولاماز . فقط ینه بو علم کوستریورکه بر آزالستیقی اولمایان دار اصول
محاکمه قاعدہلری ایله ده حق تظاہر ایدہ میور . هیچ بر واضع قانون ، حیاتک نهایتسنر
تجلیاتی تماماً درپیش ایتدیکی ادعاسنده بولوناماز . بناءً علیه حاکملره ، محدود برچرچیوه
داخلنده اولسه بیلہ ، دعوالری اداره و تحقیق خصوصنده سربستی ویرمک چوق لازمدر .
مثلا قانون ، طرفیندن هر برینک بالعموم دلیللرینی تدقیقی اساسلی بر قاعدہ اولارق قبول

ایتملیدر ، فقط ، دعوانک اثباتنه یارامیه جنی آشکار اولان ویاخود دعوایی قاریشدیرمق ، اوزاتمق ، مصرفه بوغمق کی مقصدلره برطرفک خیالخانه سندن ایجاد ایده بیلدیکی بالعموم دلیللری دقتله تدقیق ایتمک کلفتی حاکم لره تحمیل ایدیله مز . بوصورنده اصول محاکمه بر تزویر وسیله سی اوله جق ، حقلی اولانلر ، مزور خصملر مواجه سنده دعوایه دوروشمق ایچون چوق تردد ایده جکلردر .

یکی اصول محاکمه قانونی ، « طرفینک حق و وظیفه لرینه دائر » اولان فصلنده دعوالرک تحقیق و رؤیتی خصوصنده حاکم لره اولدجه واسع صلاحیت طایمقده در . تحقیقات حاکمی ، ایشی بالذات ولایقیله قاورامق ، دعوایی تزویره ، مصرفه بوغمامق ، اوزاتمامق ایچون بر چوق تدبیرلر اتخاذا ایده بیلیر : بر کره دعوانک هر حالنده رأساً طرفینی بالذات استماع ایتمک اوزره حضورینه دعوت ایده بیلیر . لزومسز اولدیغنه قناعت کتیردیکی دلیللرک استماع ایدلاماسنه قرار ویره بیلیر . یکدیگریله برلشمش دعوالرک تفریقته ، یکدیگریله ارتباطی اولانلرک برلشدرمسنه رأساً قرار ویره بیلیر . بناء علیه طرفینک اسکیدن اولدینی کی دعوانک بعض قسملرینی آتی به تعلیق حقلمی یوقسه ده حاکم ، فائده لی عد ایده رسه مسئله یی تفریق ایده رک ادعا ویا مدافعه واسطه لرندن هر برینی آری تحقیقه تابع طو تابیلیر . بوندن ماعدا ، حاکم ، قانونک تعیین ابتدیی برچوق احوالده قانونی مدتلری تزیید و بعضاً ده تنقیص ایده بیلیر کندی طرفندن تعیین اولتان مدتلری ایسه معقول سببلره بناء ، بردفعه به مخصوص اولمق اوزره ، دائماً تمدید ویا تنقیص ایده بیلیر . خلاصه نوشتاتل قانوننک شورای دولت طرفندن احضار ایدلش اولان ، اصول محاکمه قانون لایحه سی اسباب موجب مضبطه سنده ذکر اولوندینی وجهله اصول محاکمه به ، دعوالرک اعظمی سرعت ، اصغری مصرفه و حاکمک بیلهرک حکم ویرمسی تأمین ایده جک رجریان ویرمک لازم کله جکلدر . بویوک مجلس مجموعه سی جلد 90 صحیفه 277

8 — مع مافیه حاکمک بوصلاحیتلری حدودسزونهایتسزدکلدر : حاکم بر کره طرفینی ، انحق ادعا و مدافعه حدودی داخلنده استماع ایده بیلیر . طرفلرندن تماس اولغانیان مسائله دائر کندیلرینک استجوابی ممنوعدر .

دلایلی رد و قبول خصوصنده کی تحقیقات حاکمک صلاحیتتی ، محکمه تعدیل ایده بیلیر . کذلک حاکم ، ویردیکی مهلتی بردن فضله تمدید ایده مز . صراحت قانونیه اولمادجه قانونی مدتلری هیچ برسببله تمدید ویا تنقیص ایده مز .

ایکنجی درس

شفاهی و تحریری اصول محاکمه - دعوائک اصول اقامه سی - صورت و رؤیتی

9 — واضح قانون، دعوائک ممکن اولدینی قدر آز مصرف و امنیتله رؤیتی تأمین ایچون اصول محاکمه دن فضله مراسمی طی ایتمش، طرفیندن برینک غفلتندن دیکرینک استفاده ایده ماممنی، طرفینک سربستجه بالجله ادعا و مدافعه لرینی بیان ایده بیلرینی و نهایت دعوائک لزومسنر تعلیق برینک اوکنه کچیلرک اعظمی سرعتله، امنیتله تحقیقی و نهایت شکله متداثر اهمیتسنر خطالرک، حق اخلاص ایتمامسی ایچون احکام وضع ایتمشدر. بناء علیه اصول محاکمه نک دعوائک تحقیق و رؤیتله وضع ابتدکی شکلر، مدتلر،

(A) اصول محاکمه نک حقسنزلغه محل بر اقامه سی، و حق اظهار

(B) دعوائک ممکن مرتبه چابوق انتاجی

(C) طرفینک، ایشک اهمیت ایله متناسب اولیه جق مصرفله قاتلامامسی ایچون تعیین ایدلمشدر. ذاتاً بوملاحظه لر ایله قابل ایضاح اولمایان مراسم، مدتلر ای بر اصول محاکمه ده بر بولاماز. درسلمزده اصول محاکمه نک احکامنه سریع بر نظر عطف ایده رکن بو احکامک استهداف ابتدکی غایه بی ده ایضاحه چالیشه جغز.

10 — اصول محاکمه مزک سیستمده، قاعده اولارق، محاکمه هم تحریری و هم شفاهیدر. فقط اصول محاکمه نک تحریری جهتی غالبدر: محاکمه شفاهیه ابتداء تحریری بیانلر ایله احضار اولنق لازمدر. مع مافیه شفاهی اصول محاکمه یه تابع ایشلرده محاکمه شفاهاً جریان ایده ر.

اصول محاکمه عادیده، طرفین، تحریراً ادعا و مدافعه سبیلرینی تثبیت و یکدیگرینه تبلیغ ایتدکن صوکر شفاهاً بونقطه لری توضیح و مناقشه ایده لر.

دعوالر شفاهامی یوقسه تحریرامی تحقیق اولنمالیدر؟

ایکی اصولک کندیبه مخصوص فائده و محدودلری وارد ر.

تحریری اصولده طرفینک ادعا و مدافعه لرینک نه دن عبارت اولدینی قطعاً معلومدر. قاجاماق نقطه یوقدر. ادعا و مدافعه سبیلری حاکمک، طرف مخاصمک دائماً کوزی اوکنده در. بوسبیلرک بالاخره ایشه کلدیکی کبی تاویل و تفسیرینه، اکیلنه، اونوتولماسنه، کله لرینک ده کیشمه سنه امکان یوقدر. بالعکس شفاهی اصول محاکمه ده بودرجه امنیت

موقدر . شفاهی محاکمه اصولاً نهاده ، جوانی و بره جکی ائنه خصم ، حکم و بره جکی زمان حاکم ، ادعا و مدافعه سبیلرینی قطعیتله ، نثیت ایدمهزلر . شو حالده ادعا و مدافعه سبیلری تحریراً نثیت ایدلماش ایسه بالخاصه قاریشقی ، تأویل مساعد اولان مسئلهلرده محکمه لایقیده تنور ایدمهزلر . محکمه نك سرد ایدیلن بعض ادعا و مدافعه واسطه لرینی اونوته رق ، تدقیق ایتامسی چوق ممکندر .

شو حالده اصول محاکمه نك تحریری اولسی حقلی بر دعوانك قازانماسی ، حقسنك قایب ایدلسی ایچون بك مهم بر تأمیناتدر .

دیگر طرفدن اصول محاکمه نك شفاهی اولسندهده مهم بعض فائده لر وارددر . تحریراً و ایجه دوشونیلرک حسابله سویله نیلن بر چوق یالانلر ، قارش قارشیه متقابل شفاهی ایضاحات نتیجه سنده میدان چیقار . شفاهی بر بیان و ایضاح ، بر سؤاله جواب ، لازم اولان نقطه ده سکوت ، بعضاً مهیمیتی ازاله ایدمهزلر . حیلله یی میدان چیقارر . ماسکینی آنا . نهایت حا کملر ، طرفینك شفاهی ایضاحاتندن ده ائی تنور ایدمهزلر دعوائی ده جانلی اولاروق کورر ، شفاهی بیاناتده مهم نقطه لر حقنده حا کمك بالخاصه نظر دقتی جلب ایدیله بیلر . بناء علیه بر طرفك ، یوکسك سسله ، سامعلر حضورنده اختلافی ، حا کمه بیان ایتامسی حقت تظاهری نامنه کذلک بك مهم بر تأمیناتدر .

هرایکی اصولك فائده و محذورینه بناء ائی بر قانونده ایکیسی اورتاسنك قبولی شایان توصیه در . فرانسه ده ، آلمانیا ده ، نوشاتلده ، متوسط سیستم قبول ایدلشدر . آنجق بعضاً شفاهی مراغه یه بعضاً ده تحریری بیاناته فضله اهمیت عطف اولنمقده در .

نوشاتلده و اصول محاکمه قانونمزدده اصول محاکمه عادی دهده تحریری جهت غالبدر . بر حالده که تحریراً بیان ایدلمه یلن ادعا و مدافعه سبیلری شفاهاً در میان ایدیلمهزلر . شو قدر که حادثه دیدیکمز و دعوانك ائنا ی رؤیتنده و بونك رؤیتی تأمین و تسهیل ایچون محکمه دن حل طلب اولنان مسائل ، منحصرأ شفاهی و تحریری اصول محاکمه یه تابع طوتیله بیلر . طرفین حادثیه دائر طلبلرینی شفاهاً و یا تحریراً بیلدیرمکده سربستدرلر . (ماده : 222) حاکم ، طرفینی استماع ایندکدن صوکرأ ، و یا منحصرأ اوراق اوزرینه قرار و برمکده سربستدر . مدعی علیه ، محکمه یه کلیه نك تحریرآده حادثیه قارش مدافعه سنی در میان ایدمه بیلر . (224)

مدعى ، اعتراضات ابتدائيه سنى محكمه ده شفاهاً بيان ايدەر . آنجوق مستثنا اوله رق مدعى عليه ، ابتدائى محاكمه ده درميان ايتمكه مجبور اولدينى اعتراضات ابتدائيه سنى ، اساسه جواب ايجون معين مدت ظرفنده تحريراً بيلديرمك مجبوريتنده در . وظيفه ، دعوانك رؤيته دوام اولندينى صروده اقامتكاهنى اجنبى مملكتنه نقل ايدەن مدعيدين تأمينات طلبى كى ، محاكمه ده دوام اولوندينى صروده ده دخى درميان ايديله بيله جك اعتراضات ايسه ، منحصرراً شفاهى اوله رق يعنى اولجه تحريراً بيلديرمكه لزوم اولمقسزىن تدقيق اولونابيلير .

11 — دعوا عرضحال ايله اقامه اولونور .

بو عرضحاله ، طرفينك هويتى ، ويرلديكى محكمه (ماده 115) يازلىق لازم كلديكى كى ، دعوانك نەدن عبارت ونه كى مادي و حقوقى سببلره استناد ايتديكى كوسترملك مجبوريدر .

مادى سبب ، دعوائى ايجاب ايتمش اولان فعلى و حقوقى برواقعه در . حقوقى سبب ايسه بو واقعه دن چيقارلىق ايسته نان حكمدر . فقط مدعى نه مادي سببى اثبات ايدە جك دليللرينى ونه ده هانكى قانونك هانكى ماده سنه استناد ايتديكى عرضحالنده ايضاح ايتمك مجبوريتنده دكلدر . مدعى ، مسئله ماديه يي نه صورته اثبات ايدە جكتى ، خصمنك جوابندن وحادثه يي انكارندن صوكرا بيان ايتمك ومسئله قانونيه اوزرنده ايسه هيچ بريانده بولونماق حق و صلاحيتنى حائزدر .

بو عرضحال ايله محكمه ، دعوايه وضع يد ايدەر . بو دقيقه دن اعتباراً رئيس تحقيقات حاكمنى تعيين ايدەر . تحقيقات حاكمى ، دعوانك تنور ايتسنه وسرعتله انتاجنه نظارت ايدەر ، وبونك ايجون تدبير آلير .

12 — دعوا عرضحالك محكمه قلمنه قيدى كوننده باشلامشدر .

دعوانك باشلامسى اوزرينه دعوانك تحقيق و حكمه مدار اولمق اوزره برچوق معاملات واشكال ، يكديكرى تعقيب ايدە جكلدر .

دعوانك باشلامسيله ، طرفين آراسنده بر مناسبت حقوقيه حاصل اولور . بومناسبتك احكام ونتائجى اساس قانونلرى و اصول محاكمه قانونى ايله تعيين ايديلمشدر . مثلاً بورجلر قانونى موجبجه مرور زمان منقطع اولور . فائض جريانه باشلار .

بو مناسبت حقوقيه ، حكمه ويا دعوا اسقاط اولنجه يه قدر متماديدر .

بعض مؤلفر بومناست حقوقیه نك مقاوله یه بکزه ر ضمناً منعقد عدلی بر مقاوله دن نشئت ابتدیی فکر نده در . حالبوکه بوراده مدعی علیک رضایی موضوع بحث اولدیغنه کوره بومناستی مقاوله اساسنه استناد ایتدی بر مک دوغرو اولاماز . بومناست دوغریدن دوغری یه قانون ایله تأسیس ایدلشد . مدعی علیه سکوت ایتسه ویا صراحتیه موافقت ایتسه بیله مناست بوحقوقیه حاصلدر .

دعوادن متحصل مناست حقوقیه ، طرفین آراسنده موجوددر . دولت ایله دعوا جیلر آراسنده دعوانک فصلندن عبارت اولان مناسبات یعنی دولتک فرده قارشی موجود احقاق حق وظیفه سی حقوق عامه قاعده لرینه تابعدر .

13 — دعوا مناست حقوقیه سی اصول محاکمه اعتباریله طرفینه بالخاصه بوجه آتی بورجلری تحمیل ایدر :

طرفیندن هر بری (مدعی قدر مدعی علیه) دعوائی تعقیب و حکم ویرلمسی طلب حقی حائزدر . مدعی ، اولدن اولدیغی کبی مدعی علیه موافقتی استحصال ایتهدن دعواسندن واز کچه مز . مدعی علیه قدر مدعی ده دعواده اثبات وجوده مجبوردر . محکمه یه عدم اجابت حالنده وسائط مادیه جبرییه مراجعت اولونا ماز . ایتسه ده بوعدم اجابت ، حقک ضیاعنی موجب اولایلر .

طرفیندن هر بری ، حاکم طرفندن ، دعوانک تحقیق ورؤیتی تأمین ملاحظه سیله و صلاحیتی داخلنده ویریلن امرلره اطاعته مجبوردر .

نهایت طرفیندن هر بری ادعا ومدافعه سنده حسن نیتله حرکت مجبوریتنده در . از جمله یالان سویلمکدن ، افترا ایتمکدن ایشی قصداً اوزاتمقندن ، اصول محاکمه قاعده لرینی بر تزویر واسطه سی اولارق قوللانمقندن ممنوعدر .

قانون سوء نیت ایله دعوائی تعقیب ایتش اولانلری مصارف محاکمه دن ماعدا ، آووقات اجرته نه ده محکوم ایتمکده در . جنوره قانوننده اولدیغی کبی ، سوء نیتی ، یالانی صورت مطلقه ده جزالنیدر مق بلکه ده معقول اولور ایدی .

جنوره اصول محاکمه سنک 486 نجی ماده سنده یالان افادات و ایضاحات ایله احتیاطی تدبیر قرارینی آلانلر ، مدتلی تمدید ایتدیره نلر ، استحصال ایده نلر ، ادعا ومدافعه سی سوء نیتیه دلالت ایدن هر هانکی بر واسطه یه استناد ایده نلر ، مشروع سببه مستند

اولماق سزین دعوايه مداخله ایده نلر ، اعلامك تفسیری واعاده محاکمه ، استیناف طریقینه مراجعت ایده نلر ، حاکمك امرینه مخالفت ایده نلر صورت عمومیه ده تضمینات و جزای نقدی به محکوم ایدیلیر . جزای نقدی بش یوز فرانفی تجاوز ایتمز . (488) تضمینات ضرر و زیانه تماماً تقابل ایتلیدر (489) .

جنوره قانونی یالان بیانات و ایضاحاتك فاعلی دوغریدن دوغری به آوقات ایسه ویا آوقات بیلهرك موكلنك امریله حرکت ایتمش ایسه آوقاتی جزای نقدی به محکوم ایتکده در (493) .

14 — مدعینك عرض حال مباشر واسطه سیله ودر حال خصمه تبلیغ اولونمق لازمدر . تحقیقات حاکمك مسئله یی تدقیق ایتسی ، تبلیغاتك همان و ممکن ایسه او کون یاپیلیمسنه مانع تشکیل ایده مز . یالکزر مدتك تنقیصنی طلب ایدن مدعی ، صورت مخصوصه ده تحقیقات حاکمه مراجعت ایدر و یا خود مدعی عامك اقامتگاهی اجنبی مملکتده اولمسی کی مدتك تمبدینی موجب بر سبب وار ایسه ، مدعینك كذلك تحقیقات حاکمه صورت مخصوصه ده مراجعت ایتسی لازمدر .

مدعی علیه ، اون کون ویا تحقیقات حاکمك ایشك اهمیت و مستعجلیتنه ، مدعی علیه اوزاقده ساکن بولمسنه کوره زیاده ویا نقصان اولارق تعیین ایتدیکی مدت (ماده : 182 ، 183 ، 198) ظرفنده تحریراً مدافعه سبیلرینی ویا وار ایسه متقابل دعواسنی تحریراً مدعی به تبلیغ ایتدیرمکه مجبوردر .

مدعی علیه لایحه سنده دفعاً یکی بر واقعه در میان ایتمش ایسه ، مدعی بونلری كذلك اون کون مدت ظرفنده قبول ویا رد ایتدیکی خصمنه بیلدیرمك مجبوریتنده در . مدعی ، بودفعلری قبول ایتمکه برابر بونك حکمی رفع واسقاط ایده جك دیگر بر دفع در میان ایتك ایسته یورسه بونی مذکور مدت ظرفنده تحریراً بیلدیره جکدر .

فقط ، مدعی علیه ، جواب لایحه سنده ، یکی بر واقعه در میان ایتمه یه رك مدعینك ادعاسنی ساده جه انکار ایتمش ایسه ، فکر مزه کوره ، مدعینك یکی بر لایحه ایله اولسی لایحه ده ذکر ایتدیکی سبی ایضاح و تفصیل و بونی یکی دلیللر ایله تقویه ایتسی لازم کلز .

مدعینك جواب علی الجوابنه قارشی مدعی علیه اون کون ظرفنده یکیدن جواب ویره بیلیر .

15-- تحریری لایحه لردن مقصد ، طرفینك ادعا و مدافعه نقطه لرینی قطعی صورتده تثبیت و دعوائك بالاخره تعلیقنه محل براقیه جق صورتده بونلری یکدیگرینه بیلدیرملرندن عبارتدر . شفاهی مرافعه ، لایحه لر حدودی داخلنده جریان ایده جکدر .

تحریر آدرمیان ایدلمه مش هیچ بر ادعا و مدافعه محکمه ده درمیان و بونك حلی محکمه دن طلب ایدلمه من . فقط یکی بر دفعده بولیمه جق ، خصمی طرفندن درمیان ایدلمه مش بر مسئله نك حلی طاب ایتیمه جك طرفك ، هیچ بر لایحه ویرماتش اولسه بیله ، حقنك محفوظ قالمسی ایجابات عدالتنددر . شو حالد جوابی لایحه ویرماتش و یا خود خصمك درمیان ایتدییکی واقعله قارشی تحریری ایضا حاتده بولیمه مش اولان طرفی محاکمه دن غائب عد ایدرهك محاکمه یی 398 و متعاقب ماده لر احکامنه توفیقاً اجرا ایتك جائز اولاماز .

تحریر آ جواب ویرمه مش اولان طرف ، محاکمه شفاهی ده انکار ایله اکتفا ایدره بیلیر . (دلیل 201) فقط بو طرف ، یکی بر واقعیه درمیان ایدرهك اثباته قالدیشاماز . آنجق بناءً تحریر آ اعتراضی قانونی مدت ظرفنده ویرمه مش طرفه حاکم ، محاکمه شفاهی اثناسنده معذرتنه تحریر آ اعتراضی بیلدیرمسی ایچون اوچ کونلک منضم بر مدت ویره بیلیر .

واقعا 398 نجی ماده ده « ایکی طرفدن بری تعیین اولنان کونده تحقیقات حاکمی نزدنده و یا محکمه ده حاضر بولونمادینی و یا جوابنامه سنی کوندرمدیکی ... تقدیرده غیاب قراری » ویرله جکی مذکوردر . بونقطه ده اعتراف ایتلی یزکه قانونك افاده سی سقطدر . و مقصدینی افاده ایدره میور . اولانوشاتل قانونك مقابل 343 نجی ماده سنده بوقید یوقدر . بو خطانك نه دن نشئت ایتدیکنی غیاب فصلنده آراشدیرمغه چالیشاجوز .

16 -- اقامه دعوائك وجوده کتیردیکی مناسبت حقوقیه نك بر نتیجه سی ده مدعی ایلك لایحه سنده بیان ایتدیکنی ادعا و مدافعه سبیلرینی توسیع و تعدیل ایتمکدن ممنوعدر . مکرکه طرف مخاصم موافقت ایتش اولسون . شو حالد لایحه سنده خطاء بر نقطه یی یا کلاش یازان ادعا و مدافعه سنك بر نقطه سنی اونوتان طرف اصلاح طریقته مراجعته مجبوردر . [1]

[1] اصلاح ، بر طرفك یاپدینی اصوله متعلق بر معامله یی ده کیشدرمه سیدر . طرفینده هر برینك برر کره دعوالرینی اصلاح ایتك حق لری وارددر . اصلاح حقنده بوکا مراجعت ایدن طرفك بیامه ایدرجکی نقطه دن یاپیمش اولان معامله لردن ، قانونك 87 نجی ماده سنده مذکور اولانلر محفوظ قالمق شرطیله یکیدین یاپیماسی لازمدر . بوعاریق ، شکل خطالری سببله حقك ابدی اوله رق مستور قالماسنی تأمین ایچون تأسیس ایدلمشدر .

ایده بیلیر . بوتقیدرده مدعی یکیدن ویره جکی لایحه ایله بو واقعهیه مرتبط دیکر مسئله نك تدقیقی طلب ایده بیلیر .

اعتراضات ابتدائیة : مدعی علیه ، جواب مدتی ظرفنده اساسه جواب ویرمیه رك اعتراضات ابتدائیة درمیان ایده بیلیر . اعتراضات ابتدائیة ، دعوانك ، تصویر ایدیلن حالنده و شكنده رؤیت ایدله مامسنی اقتضا ایدن سبیلردر . بوسبیلرك قبولی تقدیرنده اساس ادعا حقنده قضیه محكمه موجود اولاماز . مراسم مقدمه نك ایقاسندن صوكره دعوانك یکیدن اقامه سی جائز اولور .

اعتراضات ابتدائیة درمیان ایدلمش ایسه اساس دعوانك رؤیتی تعلیق اولونارق اول امرده بواعترضلر حل اولونور .

اعتراضات ابتدائیة درمیان ایدلمه مش ایسه ویا ایدیلوبده حل اولوندقدن صوكره مدعی نك ادعاسنه و مدعی علیه ك مدافعه سنه اساس اتخاذ ایتدیكى بالجمله مسئله لر بردن تدقیق اولونور .

بالكر 221 نجی ماده حكمه توفیقاً تحقیقات حاكمی ، محاكمه بی بسیطلمش دیرمك ویا قیصالتق ایچون ، لازم عد ایده رسه ، رأساً ویا طرفیندن برینك طلبی اوزرینه ادعا و مدافعه سبیلرندن بعضیلرینك دیکرندن اول تحقیق و حكم ایدلمسنه قرار ویره بیلیر .

18 — محكمه نك كرك اعتراضات ابتدائیة و كرك دعوانك تفریق اولنان جهتلری حقنده ویردیكى قرار نهائیدر . یعنی محكمه قراريله بو مسئله لری صورت قطعیده حل ایدره . ذاتاً بوكی مسئله لك ابتدادن قطعاً حل و فصلی ایچوندركه تحقیقات حاكمك طرفینی محكمه یه سوق ایتسی مناسب كورلمشدر .

بالعكس دعوانك اثنای رؤیتنده بونك تحقیق و رؤیتی تسهیل و تأمین ایچون تحقیقات حاكمی طرفندن اتخاذ اولنان قرارلر نهائی اولمایوب آراقار ایدره . اره قرارلرینك نهائی قراره نظراً وصف فارقی ، فكر مزه كوره ، دعوانك بسبتون محكمه دن چیقوب چیقمامسنده اراماملیدره . چونكه بوتقیدرده ركره مثلامدعی نك ادعاسنه قارشى مدعی علیه دعواى متقابله ده بولونوب تحقیقات حاكمی بونلرك تفریقه قرار ویرمش ویا طرفین ، بالاتفاق بعض ادعالری آتی یه تعلیق ویا بی تعبیرله تفریق ایتمشلر ایسه تفریق ایدیلن بوا دعالر حقنده کی محكمه قرارینی ده نهائی عدا ایتماك لازم كله جكدر . زیرا ایللك عرض حالده بیان ایدیش و هنوز محكمه ده در دست رؤیت ادعا واردر . اره قرارى ایله نهائی قرارك وصف فارقی برینك قابل تبدیل دیکرینك قطعی اولمسنده در . محكمه ، اعتراضات ابتدائیة ویا دعوانك تفریق اولنان بهض جهتلری حقنده ویردیكى قرارلری

ده کیشدیره من. بناء عليه بونلر نهائيدر . يالكيز تحقيقاته ، دخول محاکمه کي تحقيقاتک ، حاکمک حادثه لر حقنده اتخاذ ايتديکي قرارلر محکمه طرفدن قابل تبديل واصلاحدر . ايشته بوکي قرارلر آره قراريني تشکيل ايددر و محکمه طرفدن تبديل اولونايلير . محکمه ده ، تحقيقاتي نقصان عد ايددرک يکيدن تحقيقاته کيريشمش ايسه بولک طرفدن اتخاذ اولنال بولکا مماثل تحقيقاته دائر قرارلرده کذلک آره قراريدر .

شو حالده اعتراضات ابتدائيه ويا دعوانک تفريق ايديلش جهتلري حقنده محکمه دن صادر اولان قرارى برطرف ، ديکريزه تبليغ ايتديررسه - که محاکمه نك سرعتله وامنتله تحقيقي ايچون بولازمدر . مدت تميز بوناريچدن باشلار . بو محاکمه انناسنده حقنده غياب معامله سي ياپيلمش اولان طرف . دعوانک ديکراقسامنک رؤيتنده حاضر بولوبايلير . 19 — طرفين لايحه لر ايله ادعا ومدافعه سييلريني تثبيت ايتدکن صوکرآ ، تحقيقات حاکمي ايشک سرعتله ومصرفسزجه تنويرايتسنه چاليشير .

تحقيقات حاکمي ، کرک برطرفک مراجعتي انضباطي اوزرينه ويا رأساً لايحه لرک تعاطيسي تمام اولديغني کلايجه دوسيه يي تدقيق ايددر . طرفينک مراجعتنه انتظارايتمسزین بوندقيقاتي ياپمسي شايان تمنيدر .

نتيجه تدقيقاتنده ايشي بسيط و واضح کورر و طرفين آراسنده ماده اختلافي برنقطه ده مشاهده ايتمزه تحقيقاتک ختامی کنديلرينه قلم واسطه سيله تبليغ ايددرک دوسيه يي قلمه اعاده ايددر . بسيط ايشلرده تحقيقات حاکمي طرفدن آريجه برجلسه نك آچيلماسنه لزوم اولماديغني نوشتارل اصولي محاکمه لايحه سي شوراي دولت اسباب موجب مضطه سنده تصريح ايدلمشدر . صوکراباش کاتب دوسيه يي تدقيق ايچون اعضالردن هر برينه ويرر . اعضالردن هر برينک قاچرکون دوسيه يي تدقيق ايددرکي رئيس تعيين ايددر بونک اوزرينه جلسه محاکمه آچيلير . اوکوندن طرفين شفاهي ايضاحات ويررلر . اعضالراولجه دوسيه يي تماماً تدقيق ايتمش بولونداقلردن شفاهي مدافعه يي دقتله تعيب ايددرلر واکثريته درحال اوکون قرار ويرمک امکاني حاصلدر . بوصورتله برچوق دعوالرک کوني کونه تبليغاتي تأمين اولنق شرطيله برحق ايکي آيددر ختامی تأمين ايديلش اولاجقدر . بوراده بالخاصه قانونک 376 نجی ماده سي اوزرنده نظر دقتي جاب ايتمک موافقدر . « شفاهي محکمه ده ايکي طرفه ايکيشر کره سوز ويردکن صوکرآ محاکمه نك ختامی تفهيم ايددر - هاکم ، ايکي طرفک ابرار کلام مقننه کي مطالبه لريني ديکله دکمده صوکرآ هر برينه شفاهي محاکمه ده نرمت ايچونه سوز و بره بيله هاکمي تعيين و تفسيريم ايددريلير . » شو حالده محاکمه جلسه سي ايسته سنده ايزردن تعيين ايدلمش يکرمي اوتوز کي

ایش یازیلاملیدر . بلکه هر ایشک اهمیتنه کوره کندیلرینک رأینی آلدقن صوکر مدعی به اون بئس یکر می دقیقه مدعی علیه ده بوقدر مدت ویرملی ولیسته ده هر برینک سوز سولیه جکی ساعتی کوسترملیدر . بو صورته هم هر ایش کونی کونه بیته جک وهمده اکر تصادفاً بوقیصه ایشلر بر کونه طوبیلاشمش ایسه اوکون نسبة دها فضله محاکمه نك لیسته به کچمسی تأمین ایدیه بیله جکدر . ودیگر طرفدن اعتراضات ابتدائیه کبی بر قاچ دقیقه ده بیته جک ایشلر ایچون هفته نك بر ایکی کوتی تخصیص ایتلمیدر .

20 — فقط دعوارک هپسی بوقدر بسیط برشکلده رؤیت ایدیه مز .

طرفینک افاده لری مغلق ومتناقض ، مهم نقصان اولایلیر . بوتقدیرده حاکم کندیلرینی ویا وکیللرینی ایضاحانده بولمق اوزره دعوت ایده بیلیر . اکر طرفینی محکمه نك بولوندیغی شهر خارچنده اولماسی کبی تمیدینی ویا ایشک مستعجلنی کبی قیصالتماسی ایجاب ایسه بر سبب بولمادجقه کندیلرینه اثبات وجود ایتلمی ایچون 10 کونلک بر مهلت ویریلیر . مدنک تمید ویا تنقیضی موجب بر سبب وار ایسه تحقیقات حاکم نك تعیین ایتدیکی کونده پایلمق لازمدر . حاکم حقیقتک تظاهری ایچون لازم عد ایده رسه طرفینی دعوانک هر حالده شخصاده استجواب ایده بیلیر . ویا مسئله بسیط و واضح اولسه بیله فائده لی ومحتمل عد ایده رسه کندیلرینی صاحده تشویق ایده بیلیر . حاکم ایضاحات آلق اوزره طرفینه دعوتیه کوندرمک ایچون برینک مراجعتی بکله مه ملیدر .

هر حالده بشقه دیه جککنز وارمی؟ سؤالنه جواب آلق ایچون دعوت معاسنه اولدیغی قدرایشی اوزاتمسى اعتباریه اصول محاکمه نك وضع ایتدیکی اساسه طابان طابانه ضددر . تحقیقات حاکمی ، لایحه لره نظراً طرفینک مسئله مادیه اوزرنده اختلاف حالده اولدیغی کوررسه ، ویا خودبری ، دیکرینک ادعا ومدافعه سنه جواب ویرمامک صورتیه بونی انکار ایده جکفی احساس ایش ایسه هر حالده طرفینی حضورینه دعوت ایده ر . طرفینک آره لرنده اختلافی اولان نقطه لری تثبیت وبواختلافک حلی ایچون دلیل اقامه سنه لزوم اولوب اولمادیغی تقدیر ایده ر . فی الحقیقه بعض اختلافلر دعوا لایحه لرنده بیان اولنان ادعا ومدافعه شکلرینه وبوبابده کی شفاهی ایضاحاته نظراً قابل حل اولور . بو حالده دعوائی محکمه به سوق ایتک لازمدر . بالعکس بعض ادعالرك يالكز لایحه لرك توضیحی ایله اثباتی قابل کورونمز . بوتقدیرده اثبات ایتسی ایچون بینه کندیسنه متوجه اولان طرفه تکلیفاتده بولونور .

مسئله نك اثباتنه قرار ویرر . واثبات مجبوریتنده بولنان طرفه ، دلیللرینک نه دن عبارت اولدیغی بیلدیرمسی ایچون مهلت ویرر .

بومهلظ طرفنده بیلدیرلمیان ویکدیگرینه تبلیغ اولنمایان دلیللارایله احتیاج اولوناماز .
شوقدرکه تحقیقات حاکمی ، ایلك دلیللارک اقامه سندن صوگرا ، ایجابی حالنده ، فوق العاده
یکی دلیللارک اقامه سی ایچون بر مهلت دها ویره بیلیر . بو جهتی دلائل فصلنده تکرار
تدقیق ایده جکزر .

طرفینک یکدیگرینه بیلدیردیکی دلیللار ، کله جک درسده ایضاح ایده جکمز اصوله
توفیقاً تحقیقات حاکمی طرفندن تدقیق اولونور .

اوچنجی درس

دلیللر

بردعواده ، حقه طایمانی ویا یکی بروصیتک احداث ایدیله بیلیمسی ایچون ، بوکا
اساس اولان واقعه نك حقیقت اولدیغی اظهار ایتک ، بوخصوصده حاکمک قناعتی جاب
ایتمک لازمدر . بو حقیقتی اظهار ، حاکمی اقناع ایچون مراجعت ایدیلان واسطه لره
دلیل ویا بینه دنیلیر . کندیسنه بینه متوجه اولان طرف ، وقوعی ویا عدم وقوعی ادعا
ایتدیکی فعلی اظهار واثباته مجبوردر .

فعللاً آنجی اثبات اولنان حقلر ، موجود اولور . اثبات ایدیله میان بر حق ، رسماً
یوق عد اولونور . بناءً علیه دلائل فصلی ، اصول محاکمه ده اهمیت عظیمه یی حازدر .

اصول محاکمه یالکزر حقه اساس تشکیل ایدن واقعه لرك طرز اثباتی ایله مشغول
اولمقده در . بو واقعه لر اوزرینه ترتب ایده بیله جک قانونی حکم لرك نه صورته اثبات
اولونا بیله جکی اصول محاکمه نك موضوعی تشکیل ایتمز . قانونلر رسمی جریده ایله نشر
ایدیلیر . بونشر ایدیلش اولان متلرك مجلسده قبول ایدیلدیکی ، رئیس جمهور طرفندن
تصدیق اولندیغی اثباته محتاج دکلدر . رسمی جریده ده کی متن ، قانونک محتویاتی حقنده
قطعی بر دلیل تشکیل ایده ر . وحا کملرك بومتلری بیلدکاری فرض اولونور . قانون مدنی ،
برنجی ماده سنده قانونک تفسیری حقنده بعض اساسلر وضع ایتشددر . طرفین ، آووقاتلری ،
استناد ایتدکاری ماده لر وبونلرك نه شکلده تفسیر ایدیله جکی حقنده اوزون مطالعات در میان
ایتمک حقنی حازدر لر . فقط بوکا مجبوریتلری یوقدر . محکمه لره احکامی اظهار ایدیله یین ،
ذکر اولنمایان بر قانونی ده ، اگر طرفینک استناد ایتدکاری مسئله حقوقیه به تماس ایدیورسه
تطبیق ایتک مجبوریتنده در .

فقط اجنبی بر قانونه ویا عرف وعاده استناد ایدن طرف ، بوقانون حکمی اثبات
ایتمک مجبوریتنده در . فی الحقیقه محکمه لرك باجمله اجنبی قانونلری بیلدکاری فرضه محل

وامکان یوقدر . بوکا استناد ایدن طرف ، هر واسطه ایله ، بالخاصه بو قانونلره آشنا
کیسه لرك شهادتيله مدعاسی اثبات ایده بیلیر . استناد ایدن طرف ، اجنبی قانونی اثبات
ایده مزسه حاکم ، تورک قانونی احکامی حادثیه تطبیق ایدر . بوکون حقوق بین الملل
بر شکل آلبور . اکثر دولتر ، یکدیگری نك قانونلری احکامی اقتباس ایتکده درلر .
نته کیم قانونلریمز اسویچر دن ترجمه ایدلشدر . بک چوق احکامنده آلمان ، فرانسر
قانونلری نه مطابقدر . شو حالده ، استناد اولنان اجنبی قانوننك تورک قانونه مطابق
اولماسی احتمال داخلنده در . دیگر طرفدن اجنبی قانونی احکامنك اثبات ایديله مامسی
سیبيله دعوانك رد ایدلمسی مدعی بی فضله اضرار ایدر . حاکمک دائما قونسولاتودن ،
سفارتدن دیپلوماسی طریقله استیضاح کیفیت ایتسی ایشی سیاسی بر صفحه یه دوشوره بیلیر .
بر چوق مسئله لرك حلنی لزومندن چوق فضله تأخیر ایده بیلیر . دیگر طرفدن دولتمزک
سیاسی مناسباتده بولمادیغی مملکتلرک ، مثلاً آمریکای جنوبی حکومتلری نك قانونی موضوع
بحث اولدقده بوطریقله حاکمک مسئله بی حل ایده بیلر چکی چوق شبهه لیدر .

دیگر طرفدن حقنی تورکیا ایدن طرفلرک بوجهتی تأمل ایتلری واستناد ایده جکلی
قانونی تدارک و ترجمه و تصدیق ایتدیرملری ایجاب ایدر . بواحتیاطه رعایت ایتما مشلر
ایسه ساده جه حادثیه مندرج قانون احکامی قبول ایتدکلی نه فرضه محل واردر .
مع مافیہ لوزان معاهده سی نظر دفته آله رق بو معاهده یه واضع الامضا دولتر تبعه سی
حقنده بوباده بر استننا یا بمق لازم کله جکدر .

دلایلری اثبات قوتلری اعتباریله باشلیجه ایکی نوعه تفریق ایده بیلیر : برنجیسی قانونی
دلایلدر . ایکنجیسی ده تقدیری دلایلدر .

قانونی دلایلر ، شرائطی قانون ایله تعیین ایدیلش اولان و محکمه نك قناعتنی جلب
ایچون قانوننك کافی عدا ایتدیکی دلایلدر . اقرار ، یمین ، قضیه محکمه ، رسمی سند
وسجلار ، امضاسی اقرار ایدیلن خصوصی سندلر ، بوقیلدندر .

تقدیری دلایلر ایسه ، شرائطی و واقعیهی اثبات ایدوب ایدمه چکی رأی و تقدیر
حاکمه محول اولان دلایلدر . قانونی دلایلر خارجنده اقامه اولنان دیگر هر نوع دلایلر
حاکمی اقناع ایده رسه موجود اولور . وبوشروط داخلنده بونلره استناداً حکم ویريله بیلیر .
بونلرک قانون ایله معین خصوصی شرائطی یوقدر . یالکز قانون شاهدلر ایله اهل خبره نك
نه شرائط داخلنده ابفای وظیفه یه مجبور اولدقلینی وبونلرک نه صورتله استماع و یاتدقیقات
یابه جقلینی تعیین ایله مشغول اولمشدر . « خصوصی اسباب حکم » عنوانی آلتنده حاکمک
رأی و تقدیرینه ترک ایدیلن واسطه لرك نه شکله تدقیق اولوناجنی بیلر قانونده تعیین

اولئامشدر . بناءً علیه حاکم ، مسئله‌نک ماهیتی ، استناد اولان مادی و حقوقی سببی نظردفته آله‌رق بو واسطه‌لرک شکل تدقیقی تعیین ایدر . مثال قبیلندن بونوع دلیل‌لرک بعضیلرینی ذکر ایدم : برماکنه‌نک مطلوب وجهله ایشله‌مدیکی ، ساعتده تعیین ایدیلن مقدارده اعمالات یا مادیفی ادعا ایدیلن ایشه حاکم حضورنده ماکنه‌نی ایشلتیرره‌رک کوزلری ایله منازع‌فیه اطلاع کسب ایده‌بیلیر ؛ بونک کبی بر موزیق‌فی استماع ایده‌بیلیر ؛ محصولک لذتیه باقابیلیر . اسباب موجبیه صحیفه : 283

بعضاًده حاکم معلوم اولان حادثه‌لردن مجهول اولان بر حقیقی استدلال ایده‌بیلیر . مجهوله دلالت ایدن معلوم حادثه‌لر ، ذلالت‌لرندکی ضعفیت ، قطعیت اعتباریله اماره ، قرینه ، قرینه قاطعه ناملرینی آلیر .

قرینه‌لر باشلیجه ایکی نوعدر : برنجیسی قانونی قرینه‌لردر که بونلره قرینه قاطعه نامی ویرمک مناسب اولور . حاکمی تقیید ایده‌رلر . بوقرینه‌لر ثابت اولورسه قانونک بوقرینه‌لردن چیقاردیغی نتیجهیه ، یعنی قانوناً بوقرینه‌نک دلالت ایتدیگی قبول ایدیلن اولان مجهوله حکم ایتک مجبوری اولور . حاکم ، یالکز بوقرینه‌نک ثابت اولوب اولمادیغنی تقدیرده سربستدر . بناءً علیه بونوع قرینه‌لری ، قانونی دلیل‌لر آراسنه صوقق مناسب اولور .

فی الحقیقه نسب کبی برچوق احوالک اثباتی امکانسز دکلسمده چوق مشکدر . واقعه اولوناچق دلیل‌لر شایان اعتماد دکلدر . اونک انچون قانون مدنی ، عرف و عادت ، مادی شرائطی و الحاصل انسانلرک افعالی اوزرنده حاکم معنوی قانون طبیعی‌لری نظردفته آله‌رق محدود بعض قرینه قانونیه‌لر قبول ایتشددر . ایکنجیسی تقدیر حاکمه محول اولانلردر . بونلر تحقیقات ائسانسده ، حاکمه عرض اولونور . بواماره‌لرک موجودیتنده طرفین متفق ایشه بونلرک مدعا به دلالت ایدوب ایتدیگی ، یعنی مجهول اولان منازع‌فیه مسئله مادی‌بی اثباته کافی اولوب اولمادیغنی محکمه تقدیر ایدر . طرفین اماره‌نک موجودیتنده متفق دکل ایشه تحقیقات حاکمی ، مدعینک جدیتی ، بواماره‌نک مدعا بهک وقوعی نه‌درجه‌به قدر اثبات ایده‌بیلرک جکفی نظردفته آله‌رق بوقرینه‌لرک اثباتی امر ایدر و یا بوکا محل اولمادیغنه قرار ویرر . حاکم تقدیری دلیل‌لر ایله هر دعواده حکم ویره‌مز . حقوق اصول محاکمه‌لری قانونی موجبیه الی‌لیرایی تجاوز ایدن معاملات حقوقیه - که برحق احداث ، تحویل ، اطفا ، اسقاط مقصدلریله اجرا ایدیلان تصرفاندر - آنجق سندله اثبات ایدیلرک بیلیر . مع‌مافیہ اقرار حالنده حاکم دعوائی قبوله مجبوردر ویمیندن نکولده بوکا مماثل بر نتیجه حصوله کتیرر . دلیل‌لرک اقامه‌سی دائماً خصوصی بر اصول محاکمه‌نک تطبیقی استلزام ایتز . از جمله

طرفين ، دعوارينى اثبات ايتك اوزره لايحه لرینه اوراق و وثائق ربط ايده بيليرلر . بو وثيقه لر انىاي محاكمه ده تشریح ايديلير . حاكمه قناعت حصوله كتيورسه موجبجه حكم ايديله بيلير . كذلك اقرار ، ويا طرفينك وقوعنده مطابق اولديغى قرينه لر حاكمه مداخله سى اولقسزین اداره اولونور . و بونلر ايچون معين بر اصول محاكمه يوقدر . بالعكس شهادت ، اهل خبره آنجق حاكمه قرارندن صوكرامعين بر اصوله توفيقاً اداره ايدملك لازمدر . مشهور و معروف اولان بر واقعه يه استناد ايدهن طرفده ادعاسنى اثبات مجبوريتهنده . دكلدر (238) . ده دوغريسي هر كسك معلومى اولان بر شيك اثباتى ايچون مصرف ايتك ، وقت غائب ايتك معاسزدر . معروف و مشهور اولان خصوص ، حاكمه شخصاً بيلديكى و علاقه دار اولان محيطده محقق تاتى اولان واقعه لردر . وقايع تاريخيه ، بو قبيلدندر . مع مافيه معروف اولان بر خصوصك ، غايت چوروك بر اساسه استناد ايتسى چوق محتملدر . ياخود ظن ايديلكي كبي معروف اولماسى ده چوق محتملدر . اونك ايچون قانون ، ديكر طرفه كرك حادثه مك معروف اولما ديغى ، كرك ياكلس بيلنديكى اثبات صلاحيتى ويرمشد . خصوصى اصول محاكمه يه تابع اولمايان و دوغريدن دوغري يه مناقشه ايديله بيله جك دليللرى دوغريدن دوغري يه محكمه تدقيق ايدهر .

بالعكس معين اصول محاكمه يه توفيقاً و قراره استناداً تدقيق اولنه جق دليللر - كه شهادت ايله اهل خبره ، كشفدر - تحقيقات حاكمه طرفندن تدقيق اولونور . بناءً عليه بو اوچ نوع دليللرى تحقيقات حاكمه نه شكلده تدقيق ايده جكنى قيصه جه ايضاح ايدهلم :

شهادت : يكي اصول محاكمه قانونمى شهادتى مجبورى عد ايديور . فى الحقيقه هيچ بر كيمسه اهمالى ايله ديكرينك ضررينه سببيت ويرمك حقى حائز دكلدر . شهادت ، شاهد محكمه يه كلك ، بونك ايچون مصرف ايتك ، وقت غائب ايتك كلفتنى تحمیل ايده رسه ده . حاكم بونلره مقابل شاهدك ضرورى مصرفلرينى بول بول تقدير ايده جكدردر . بو صورته شاهد بر كونا ضرره معروض قالمقسزین برحقى محافظه ايتمش اولور . قانون خسته ويا معلول اولماسندن دولايي محكمه يه كله مەين شهادتى اقامتكاهنده استماع ايچون حاكمه صلاحيت ويرديكى كبي (255) محكمه نك دائره قضاسى خارجنده اقامت ايدن شاهدك فضله زحمته دوچار اولماسى ايچون بولونديغى محل محكمه سى واسطه سيله ده استماع ايدلمسنة مساعده ايتشدرد (257) . كذلك مستثنا حاللرده ايكي طرفك موافقتى و حاكمه تنسيبي ايله شاهد تخر برآده شهادت ايده بيلير (256) .

محکمه به شهادت ایچون اصولاً دعوت اولندیغی حالده مشروع بر سببه مستند اولمقسزین کلهمین شاهد اون بش لیرایه قادار جزای نقدی به محکوم ایدیه بیلیر (253). حاکم ، شاهدک وضعیتی نظر دفته آلهرق کندیسنی بسبتون جزادن عفوده ایده بیلیر . مع مافیه قانون ، حکمدن صوکر ، عفو قراری ویریه بیله جکئی درپیش ایتماشدر . بز ، غیاباً ویریلن قرارک ، شاهد طرفندن وقوع بولاجق اعتراض اوزرینه یکیدن تدقیق اولونابیله . جکئی محقق عد ایدیورز .

دیگر طرفندن 245 ، 246 نجی ماده لرده ذکر اولونان احوالده شاهد ، شهادتن امتناع ایده بیلیر . بوحالرده شاهدک ، شهادتی ایله کندی مادی و معنوی منفعتلرینی اخلاص ایتسی احتمالی وارد . هیچ برکیمسه ، دیگرینک منفعتی ایچون شخصاً ضرره قاتلامغه اجبار ایدیه من . شهادتن امتناعه حق اولانلر میاننده شایان قید اولارق ، مسلکری حسیله بر سوری صاقلامق مجبوریتنده بولنانلری کوربیورز . بردوقتور ، آوقات کندیسنه مشتریسنک سر اولارق تودیع ایتدیکی ویا وظیفه سنی ایفا ایدهرکن ویا وظیفه نك ضروری ایجابندن اولارق اطلاع پیدا ایتدیکی بر سوری افشا ایدهرسه جزا قانونی احکامنه توفیقاً مجازات اولونور . کندیسنک محکمه ده ادای شهادت صورتیه بوسری افشا ایتسی ده مسلکک شرفیه مناسب اولماز . اونک ایچون قانون کندیلرینی بو خصوصده شهادت ایدوب ایتماکده سربست براقشدر . مع مافیه شهادت ایدهرسه حاکم بونی نظر دفته آلیر . آنجق بوشهادت ، افشای سر جرمی حصوله کتیررمی ؟ مسئله سنی بوراده ایضاح ایده میز . بو مسئله ایچون حقوق اصول محاکمه لری قانونی شرحه مراجعت ، ماده : 245 نومرو . 4 و متعاقب . بالعکس مأمورین دولت ، رسماً اطلاع کسب ایتدکری اسراره شهادتن ممنوعدرلر . منسوب اولدقلری وکیلک ، وکیللر رئیس جمهورک ، بوبوک ملت مجلسی اعضاسی مجلسک موافقتی اولمادقجه مطلع اولدقلری اسرار دولته شهادتن ممنوعدرلر و محکمه بو موافقتی استحصال ایتدکجه کندیلرینی شهادت ایچون جلب ایده من .

شاهدلرک یمین ایتسی مجبوری دکلدیر . آنجق طرفیندن بری طلب ایدهر ویا حاکم لزوم کوررسه شاهده یمین ویریلیر . وشهادتک ختامندن صوکر یمین ایتدیریلیر . وشاهدک شهادت ائناسنده برشی صاقلاماش اولدیغی ده یمینده ذکر ایدیلیر . بوندن کلاشیلورکه شاهد ، حاکمک قناعتنه تأثیر ایده بیله جکنه احتمال ویردیکی حادثه نك بالجمه تقراتی ، سؤاله صاحب اولمقسزین بیلدیرملیدر . قصداً کتم ایتمش ایسه حقنده جزائی تعقیبات ده اجرا اولونابیلیر . حاکم شاهده ، شهادتن صوکر یمین ویریه بیله جکئی ، قبل الاستماع اخطار ایده بیلیر .

شاهد لری حاکم استجواب ایدہ ر . طرفین ، شہادتہ اثباتہ قرار ویریلش مسئلہ بی تنویر وایضاح ایچون بوکا مرتبط بعض سؤل لری شاهده توجیه ایتسی حاکمن طلب ایدہ بیلیر لر . شاهدك ، سوزی بیتمه دن بونی كسمك ، كندیسی تحقیر و تزییف ، آلفیدشلامق قطعاً ممنوعدر . وشاهده شاشیرتجی سؤلر صورمامیلدر . خلاصه كندیسی بر مظلون کی استجوابدن قطعاً اجتناب ایتك ایجاب ایدہ ر . چونكه بو حالرده حقیقت تظاهرایتمز وشاشیرمش اولان برشاهددن دوعری معلومات آلمغه امکان یوقدر .

اهل وقوف : تحقیقات حاکمی طرفندن کندی کندینه اکلایشیلمسی مشکل اولان مسائل مادیده تنور ایچون تعیین اولونور . بر ، ایکی ، اوچ اوله رق تعیین ایدیه بیلیر . اهل خبره لك ده صنعتیرنی علناً اجرا ایدہ نلر ایچون مجبوریدر . مع مافیه بزه كوره شاهد لری کی اهل خبره ده معین احوالده ایقای وظیفه دن امتناع ایدہ بیلیر . اهل خبره نك رأی ومطالعه سی حاکمی تقبید ایتمز . فقط هر حالده بونك قناعتنده خوق بونیك بر تاثیر اجرا ایدہ ر . اونك ایچون حاکم لری کی وعین سببه بناءً اهل وقوفك ده رد ایدیه بیلملری قبول ایدیلشدر .

اهل خبره تحریراً مطالعه درمیان ایدہ لر . مطالعه لرنده بالخاصه اسباب موجهه کوسترمك مجبوریتنده درلر . زیرا کندیلری حاکم دکلدر . فیکر لری ، بیان ایتدکاری اسباب موجهه حاکمی اقناع ایدہ رسه دلیل تشکیل ایدہ جکدر . طرفیندن هربری ، ویا حاکم سرد ایتدکاری مطالعه لری ایضاح ، نقصان براقدرلری اسباب موجهه لری اکل ایتك اوزره اهل خبره بی محکمه حضورینه دعوت ایدہ بیلیر . اهل خبره وظیفه لری ایضا ایچون تدقیقات ابتدائیه یابایلیر لر . بوتدقیقاتلری هر حالده طرفینی دعوت ایتد کدن صوکر ایلملری ایجاب ایدہ ر که بوجهت اهل خبره به حین تعیینلرنده اخطار ایدیلیر .

بشنجی درس

محاکمه

کچن درس لمزده تحقیقاتك نه صورتله اجرا ایدیه جکی حقنده عمومی بر معلومات ویرمش ایدك . خلاصه ایدہ رسه ك : اولاً مدعی تحریراً ادعاسنه اساس اتخاذا ایتدیکی مادی واقعہ بی وبوندن چیقاراجنی حقوقی نتیجه لری تحریراً بیلدیره جك ، مدعی علیه یا اعتراض ابتدائیه درمیان ایدہ رك بو ادعاك فی الحال تدقیق اولونامیه جفی ویا خود اساسندن وارد اولمادیفی تحریراً بیان ایدہ جك ومدعی ده بودفعه قارشو جوابلری بی ویره جك ، مدعی علیه

بوجوابه قارشی دیه جککرینی دیه جک . تحریری متقابل ایضاحات نتیجه سنده مسئله توضیح ایتمس ایسه تحقیقات حاکمی ایکی طرفدن برینک مراجعتی بکله مدهن تحقیقاته ختام ویره رک طرفینی محکمه به سوق ایده جک ، اگر برطرفک افاده سی مبهم ، متناقض ، ویا لایقوله آکلاشیلا میور ایسه طرفینی حضورینه دعوت ایله کنیدی لرندن شفاهی ایضاحات آلیر ، اگر ادعا اولنان مسئله مادینه نک وقوع بولوب بولمادیقنده اختلاف وار ایسه اختلافی نقطه لری تثبیت ایدر ، ایجابنه کوره و حقیقتک تظاهری ایچون لزوم قطعی کوردرسه دعوانک بعض جهت لرینی تفریق ایلر و یا خود دعوائی دیگر دعوا ایله برلشدیرر . اختلافی نقطه لری هانکی واسطه لر ایله اثبات ایده بیله جککرینی طرفینک یکدیگرینه تبلیغ ایتمسنی امر ایده ر و بونک ایچون ایشک ایجابنه کوره برمدت تعیین ایده ر .

اسناد اولنان دلیلار وقوع لری انکار اولمایان قرینه لره ، سنده مستند ایسه بونلری تقدیر ایتمک اوزره ینه تحقیقاته ختام ویرمیدر . اگر شاهد ، اهل و قوف ایله اثبات تکلیف اولمش ایسه ، آنجق بونلری شایان قبول و استماع کوردرسه ، ده دوغریسی تکلیفک جدینه قانع اولورسه بوسبیلله ایشک اوزاتیمق ایستمدیکنه بویوک بر احتمال ویرره بونلری اجتماع ایده ر . عکس تقدیرده بونلری استماع ایله اضاعه وقت ایتمه رک تحقیقاته ختام ویرر .

تحقیقاند ختامی متعاقب ، اوزون اوزادی به راپور یازمق کبی کلفته احتیاج یوقدر . یالکز طرفینک اختلاف ایتدکاری نقطه لرک نه دن عبارت اولدیغی ونه کبی واسطه لر ایله اختلافی نقطه لری اثبات تکلیفنده بولوندقلرینی و بو واسطه لری نه ایچون قبول ایتدیکنی ویا ایتدیکنی و دلائلک استماع و تدقیق ایدلیدیکنی و نتیجه سنی کوسترمک کافیدر .

نتیجه تحقیقاته نظراً طرفینک یکیدن تحریری ایضاحات ویرملرنده فائده ملاحظه اولونابیلیر . اونک ایچون قانون 375 نجی ماده سنده تحقیقاته ختام ویرلندن اول طرفیندن هر برینه نتیجه مدعالرینی ایضاح ایدن برلایحه ویرمک ایچون مساعده ایدیور . بوحالده تحقیقات حاکمی نه مدت ظرفنده لایحه ویره بیله جککرینی تعیین ایدر . قانون بولایحه نک تبلیغی لازم عد ایتدیکندن باشکاتب طرفندن صورتی مراجعت وقوعنده دیگر طرفه ویرمک لازم کلیر (ماده : 146)

نوشاتل قانوننده بولایحه نک ویرلمسی طرفین ایچون برحق تشکیل ایتمز . تحقیقات حاکمی تحقیقات اوراقنه نظراً موافق کوردرسه بوطلبی اسعاف ایده ر .

تحقیقات حاکمی تحقیقاته ختام ویردکن صو کرا دوسیه بی محکمه ریسنه ویرر . رئیس اوراقی باشکاتب واسطه سیله اعضالر آراسنده دولاشدیردکن صو کرا (158) شفاهی عرافه کوتی تعیین ایده ر و طرفینه تبلیغات یاپار مدت بر هفته دن آشاغی اولاماز . صلاح

محکمه لرنده شفاهی مرافعه اختیاریدر . طرفین بالاتفاق شفاهی مرافعه دن صرف نظر
ایده بیلیرلر . بزه کوره یا لکیز برینک ده صرف نظر اتمی نمکندر . بو طلب صراحة
یا پیله بیله جکی کبی محاکمه کوننده کلمه مک صورتیله ضمانده یا پیلا بیلیر . بناء علیه کلمه دن
طرف حقنده غیاب معامله سنی ایفایه محل یوقدر . همان اوراق اوزرینه حکم ویریلیر .
صلح محکمه سنده طرفین طلب ایدرسه ، محکمه اصلیه ده ایسه هر حالده شفاهی مرافعه
مجبوریدر . شفاهی مرافعه دن مقصد تحریراً بیلدیرلش اولان مسائل مادیه و حقوقیه مک
محکمه حضورنده بو کسک سسله شفاهاً ایضاح و تفصیلیدر . بو مرافعه ایله طرفین حاکمی کندی
ادعایرینه اقناع اتمک چالیشیرلر . شفاهی مرافعه ده سوزلر ضبطه کچیرلر ، مکر که فراغت ، قبول
اولسون و یا خود محکمه اکل تحقیقانه قرار ویرسون . او حالده حادته و یا قرار ضبطه قید اولونور .
طرفین شفاهاً محکمه جلسه سنده ایستدکلی قدر سوز سویله مزملر . بر کره محاکمه مک
انتظامی اخلال ایده جک صورتده و یا دعوا ایله هیچ بر مناسبتی اولمایان سوزلر منع اولو-
نایلیر . سوکرا محکمه ، طرفیندن هر برینک نه قدر مدت ایضاحاته بولونه بیله جکی تعیین
ایدهر . ساعت کلدکن سوکرا آرتق هیچ ایضاحاتی دیکه مز . حاکم بو مدتی تعیین
ایدهر ایکن آوو قاتلرک مطالعه سنی المالیدر . بالطبع هر آوو قاته ایستدیکسی مدت دکل ،
ایشک ایجابنه و محکمه مک دیگر ایشلرینه نظراً بر مدت ویریلیر (376) .

محکمه دوسیه بی اولجه تدقیق اتمش بولوندیغی ایچون شفاهی ایضاحاتی متعاقب در حال
قراری ویرر . بناء علیه قاعده اولارق محاکمه عین کونده بیتمک و قرار ویرمک لازمدر .
معافیه شفاهی مرافعه اوزرینه مسئله بی یکیدن تدقیقه احتیاج کورولورسه محکمه ،
مذاکره کوتی تعیین ایدهرک کیفیتی طرفینه تفهیم ایدهر .

غیاب

شیمدی به قدر ویردیکمز ایضاحاته طرفینک جوابلرینی و قتیله ویردیکنی و تحقیقات
حاکمی طرفیندن طلب وقوعده ایضاحات ویرمک اوزره بونک دعوتنه اجابت ایستدکلی
و یا محکمه کونی شفاهی مرافعه ایچون کلدکلی فرض ایتدک . طرفیندن بری تحقیقات
حاکمی طرفیندن ایضاحات شفاهی ویرمک ، دلائلک استماع و اداره سنده حاضر بولمق
اوزره کلدیکسی و یا شفاهی مرافعه کونی حاضر بولمادیق و یا خود کلویده جوابدن امتناع
ایتدیکسی تقدیرده علینه غیاب قراری ویریلیر .

اصول محاکمه مک 398 نجی ماده سی طرفیندن بری تحریری جوابی کوندرمدیکسی
تقدیرده غیاب معامله سنیک یا پیله جغنی افاده اتمکده در . بزه کوره بوراده بر افاده

خطاسی وارد که قانونک ظاهر مقصدینه ونوشاتل قانونه کوره تصحیح اولمالیدر .
 بوراده جوابنامه دن مقصد ، هر حاله لایحه لر اوله ماز . ظن ایدرم که قانون بوتعبیری
 قصداً قوللانامشددر . فی الحقیقه 201 نجی ماده دیور که « مدعی علیه مدعینک عرضحالنده
 بیان اولنان واقعهری انکار ایله اکتفا ایتمزسه لایحه آشاغیده کی خصوصری احتوا
 ایده جکدره . بناء علیه انکار محض ایله اکتفا ایتش اولان مدعی علیه جواب لایحه سی
 ویرمیش اولمسی عاینه غیاب معامله سنک پایلمسنی استلزام ایده مز . لایحه دن مقصد ادعا
 و استاد اولنه حق بر سبی محکمه یه وخصمه بیلدیرمکدر . انکار ایدن کیمسه نک مطلقاً
 تحریراً بونی بیلدیرمه سنده برمنطق یوقدر .

دیگر طرف دن 198 نجی ماده مدتی ظرفنده جواب لایحه سی ویرمیش اولان طرفه معذرتنک
 قبولی حالنده اوچ کونلک برمدت ویریه جکنی تصریح ایتشددر . بناء علیه مجرد جواب لایحه سنک
 ویرلما سنک غیاب معامله سنه اساس اولدیغی ادعا ایتک قانونک صراحتیه قابل الیف دکدر .
 شو حاله جواب لایحه سی ویرمیش اولان کیمسه محاکمه شفاهی ده محتاج اثبات بردفع
 درمیان ایده مز . بودفعی دیکلنه مز . بلکه بوراده اصول سبیله برحقسزلق اولایلیر . فقط
 بو حقسزلق ، محکمه ده حاضر بولنان کیمسه حقنده غیاب معامله سی یا بهرق کندیسنک هم
 دفعی استماع ایتماکه وهمده واقعی اقرار ایتش عدایمکه نظراً چوق وپک چوق خفیدر .
 نوشتاتل قانوننده « جوابنامه سی کوندرمدیکی » قیدی یوقدر . پروفور ماننده
 مکتوب مزه ویردیکی بر جوابده لایحه ویرمیان طرف عاینه غیاب معامله سنک اجرا ایدیه میه جکنی
 تصریح ایدیور . شو حاله 338 نجی ماده ده کی جوابنامه نک کوندرلما سنده کی مقصد نه در؟
 بزه کوره ماده یی شو وجهله تفسیر ایتلیدر . برطرف ، قانوناً تحریری جواب ایله اکتفا
 صلاحیتی حائر اولوبده محکمه یه کلز و تحریری جوابی ده کوندرمزسه عاینه غیاب معامله سی
 پاییلیر . اگر محکمه یه کلش ویا تحریری جوابی کوندرمش ایسه غیاب معامله سی پایلاماز .
 غیاب معامله سنه قرار ویرلدکه ، محکمه جلسه ده حاضر بولنان طرفک مطالعه سی
 استماع ایتدکن صوکر ادعوانک حاله نظراً یا هیچ بر معامله ؛ یا بمقسرین محاکمه یی بشقه برکونه
 تعلیق ایدر ویا خود مثلاً حاضر بولنان شاهدلری ، اهل خبره یی استماع ویا کشفی اجرا
 ایدر . دعوائی بلا معامله تعلیق ایتدیکنی و معامله جریان ایتش ایسه جریان ایدن معاملاتی
 غائبه تبلیغ ایدرک تعیین ایده جکی کونده حاضر بولنسنی بیلدیرر . بوتبلیغات بش کونده
 وایفا ایتدیرلیدر . یعنی ایفاسی طلب اولمالیدر . اگر معامله پایلمش ویتش اولوبده
 دعوانک تعلیقنه و بناء علیه طرفینک تکرار دعوتنه محل یوق ایسه غائب اولان طرف
 بیش کون ظرفنده مراجعت ایله اعتراض ایتلیدر . بوتقدیرده نظر اولونور؛ غائب « غیباً

جریان ایدن معاملہ لک تعدیل و جرح و ابطالی موجب بر اعتراض در میان ایتدیکی تقدیرده قبول ، اولونارق یکیدن محاکمه اجرا ایدیلیر . اگر بویله بر اعتراض در میان ایتدیش ایسه غیاباً اجرا اولنان معاملہ لر معتبر عد اولونور . بزم قانونمزه کوره محکمه ، غائبک افاده سی نظر دفته آله رق شاهی و اهل خبره بی یکیدن استماع و کشفی تکرار اجرا ایتک حقنی حائر در . حالوکه نوشتارل قانوننده بوجق تماماً غائبکدر . غائب مصارق غیابیه محکوم ایدیله جکندن اگر کندسی طلب ایدر سه بومعاملہ لر اعاده ایتماک ایچون سبب یوقدر . قانونمزه دعوالری چابوق بتیرمک مقصدینی استهداف ایتدشدر . مع مافیہ ، برطرف اولدجه جدی اولان هر هانکی بر اعتراضی ، مثلاً کشف اثناسنده بر نقطه نک نظر دقتی جلب ایتماش بولوندیغنی ادعا ایدر و یاخود مسئلہ بی تنویر ایچون شاهده دیگر برسؤالک توجیهی ده فائده لی اولاجغنی ادعا ایدر سه طلبی اسعاف اولمالیدر .

محکمه ، غیاب قرار ی ویردیکی جلسده او جلسده ایفا ایدیله جکی معین بالجله معا ملہ لر یاپیلایلیر . فقط اساس دعوا حقنده هیچ برقرار اتخاذا اولونا ماز . یعنی معاملہ نتیجه سنده قرارک ویرلسی امکان داخلنده بولنسه بیله بوقرار ویریله مز . خصمه یکیدن تبلیغات یاپیلارق مدتک اقتضاسندن سوکر او غائب اعتراض ایتدیه بوضوح صده قرار ویریله بیلیر (406) . غیاباً جریان ایدن محاکمه ده غائب اولان طرف اقرار ایتش کی علیهنه مسئلہ مادیہ ثابت اولمش فرض اولونور .

بناءً علیہ مدعینک مسائل مادیہ بی دوعری سویلدیکی فرض اولونارق نتیجه طلبی قانوناً بحق کورولور سه لهنه حکم اولونور .

غیاباً ویریلن حکمه اعتراض جائز دکدر . مع مافیہ یمین مسئلہ سسندہ بر آز توقف ایتلی بز . دعوا به وجاهاً باقیلمش اولوبده یمینہ قرار ویریلنس ایسه یمین کونی یمین ایدہ جک کیمسه کلز سه یکیدن تبلیغات یاپیلماز و کندسی یمیندن نکول ایتش کی وجاهی اولارق علیهنه قرار ویریلیر . بوقرار اوزرینه محکوم علیہ تبلیغندن اعتباراً سکر کون ظرفنده مراجعتله یمین ایتک حقنی حائر در . قراره قارشی باشقه صورتله اعتراضی دیکنه مز . سکر کوندن سوکر اقرار کسب قطیت ایدر .

یمینک هر نه قدر محکمه حضورنده یاپیله جی متنده تصریح ایدلمش ایسه ده قانون ، شکل یمینک تحقیقات حاکمی طرفندن تعیین اولونا جغنی و بوفاده سنده ایدوب ایتدیه جکک کذلک حاکم طرفندن صوروله جغنی و حاکمک تمام ویا واضح اولمایان نقطه لر ی تمام ایچون بعض سؤاللر صورده بیله جکی بیان ایتدیه نظرراً بوراده کی محکمه تعبیرینک بر ذهول اولدیغنی آشکاردر . یمین تحقیقات حاکمی طرفندن ویریلیر . مع مافیہ ، محکمه بو ایضا حاکمز طرفیندن

برینک دیگرینه تکلیف ایستدیکي یمین حقنده در . بر طرفک دیگرینه یمین تکلیفی ایچون محکمه نك قرار ویرمسی لازم کلز . فقط نقصان دلایلری آتام ایچون یمین تکلیفی ایچاق محکمه نك صلاحیتی داخلنده در . و یمین ایله تأیید اولوناچق سؤالر محکمه طرفندن ترتیب و رئیس طرفندن قرائت اولونور . و رأساً تکلیف اولونان یمین محکمه حضورنده علناً اجرا اولونور . مع مافیه محکمه مناسب کورورسه بومینک تحقیقات حاکمی ویاصلح حاکمی حضورنده ایفا اولماسنه قرار ویره بیلیر .

کرك غیاباً و کرك وجاهاً اتخاذ اولنان قرارلر تحریر و امضا اولندقدن صوکره صورتلری محکمه باشکانی طرفندن هر ایکی طرفه مقبوض مقابلی ویریلیر . طرق قانونیه به مراجعت ایچون مدتلر بو تاریخندن باشلار .

قضیه محکمه

قضیه محکمه تعبیری ، لسان حقوقزده کسب قطعیت ایتمش قرارلری افاده ایدر . بر قرار علیهنه تمیز طریقنه مراجعت ایچون معین مدت منقضی اولدقدن ویا بو قرار محکمه تمیزجه تصدیق اولوندقدن صوکره او قرار حقنده قضیه محکمه موجود عد اولونور . یکی اصول قانونز ، قضیه محکمه یی بو معنایه آلمیور . بوقانونه کوره ، محکمه دن صادر اولان بر قرار ، تمیز طریقنه مراجعت ایدیلهرک ویا مدت قانونیه کچیریلهرک اکتساب قطعیت ایتمسه بیلر ، قضیه محکمه تشکیل ایدر . بناءً علیه قضیه محکمه تعبیرینک ایکی معناسی اولاجقدر . بری ، محکمه دن صادر اولمش قرار chose jugé ، دیگریدیه کسب قطعیت ایتمش محکمه قرار ی chose jugé force .

اصول محاکمه قانونی ، قضیه محکمه یی بر دلیل قانونی عد ایدهرک دلائل بحثنده موضوع بحث ایلمشدر . شو معناده که بر دعوا ده ، قضیه محکمه به استناد ایدن طرف ، ارتق ادا ویا مدافعه سنی باشقه صورتله اثباته مجبور دکلدر . وبوخصوصده حاکم تقدیری موضوع بحث اولمادیکی کبی بونک خلافتی ادا ایدن طرفده ادعاسی وسائط سائرله اثبات ایدمه . یالکز حقوق اصول محاکمه لری قانونی موجبجه محکمه اعلاملرینک خلافتی ساخته لکنی ادا صورتیه اثبات اولونا بیلیر . فکر مزه کوره بوندن مقصد ، او اعلامی موضوع بحث اولان قرارک دوعری اولمادیکی ادعاسی دکلدر . و ذاتاً اصول محاکمه قانونی بو ماده سنده ، رسمی وثیقهرک مندرجاتلرینک خلافتک ادعاسی موضوع بحث ایتمهرک یالکز شکل رسمیده تنظیم ایدلدیکي کورونن وثائق حقیقتده موجود اولمادیکی ویا تحریف اولوندیکی قضیه سیله اشتغال ایتمشدر . بناءً علیه قانون مدینک ۶ نجی ماده سی احکامی محفوظدر . شو حالده محکمه اعلاملرینک ، ویرلش قراره مطابق تنظیم ایدلدیکي ویا قرار تحریف ایدیلهرک

تنظیم اولون دینی آنجق اعلامک ساخته لکنی ادعا صورتیله اثبات اولونابیلیر . بر قرارک
یا کلش اولدینی ادعایرند ذاتاً ساخته لکده موضوع بحث اولاماز .
قضیه محکمه ادعای نه شرائط داخلنده در میان اولونابیلیر ؟ اول امرده قضیه محکمه نیک

قبولنه سائق اولان سببی ایضاح ایدلم :

محکمه لریک بر مسئله ده یا کلش اجتهاد ایتمی قرار ویرمیسی احتمالی دائماً موجود اولدیغندن
خطاسی ظاهر اولان بر حکمک دائم قلمامسی ، یرینه دوغری بر حکمک اقامه سی عدالت
نامنه بلکه شایان تمنی ایهده نظام و صلح اجتماعی محافظه ایچون اختلاف و نزاع لریک
قطعیته حلنی تأمین ایتک مجبوری تی واردر . نهایت بر زمان صو کر ا منازعه لی اولان بر
وضعیت زائل اولوب یرینه نابت ، قطعی بروضعیت قائم اولوق لازمدر . ایشته یکدیگری نه
ضد بویکی ملاحظه قارشیننده محکمه لریک احداث ایتدک لری و وضعیت لریک قطعی اولماسی و فقط
قضیه محکمه نفوذینک نسی اولماسی اساس قبول اولنمشدر . اول امرده یالکیز محکمه نیک
قرار لری قضیه محکمه تشکیل ایدر .

حاکم لریک افکار و ملاحظاتندن عبارت اولان اسباب موجب لری قضیه محکمه تشکیل
ایدلمز . حاکم لریک لایخطی اولمادیغندن فکر لرینک یا کلش اولماسی احتمال داخلنده در .
قرار لرینک ده یا کلش اولسی ممکن ایهده بو قرار له طرفینک حقوقی وضعیتی تثبیت ایدلد-
یکندن بونقطه ضروره قطعی عد اولونمق لازم کلور . حاکم لریک مطالعه لرینی دوغرو
فرض ایتک ایچون ایه هیچ سبب یوقدر . ده ا آجیق بر افاده ایله ادرته ده دوغری ،
اکری بر قرارک حصوله کتیردیکی بروضعیت وار . نظام اجتماعی محافظه اندیشه سیله
بووضعیتی محافظه ایدیورز . عکسی تبیین ایتسه بیله ، اعاده محاکمه خارجنده ، بونی
بوزمیورز . فقط بالعکس یا کلش مطالعه لری تصحیح ایتک ایچون ضرورت واردر .

قرار لریک اسباب موجب لری قضیه محکمه تشکیل ایتزهده ، چوق کره قراری آلامق ،
بونک شمولنی تعیین ایتک ایچون اسباب موجب بی نظر دقته آلامق لازمدر . دیگر بر افاده ایله ،
اسباب موجب ، قرارک شمولنی تعیین ایتدیکی درجه ده قضیه محکمه تشکیل ایدر .

ثانیاً ، قضیه محکمه موجود در دنیله بیلمک ایچون یکیدن ظهور ایتش اولان دعواده
طرفین ، سبب ، مدعا به ، اولکی دعوانک عینی اولوق لازمدر .

طرفینک وبالخاصه سبب و مدعا بهک عینی اولوب اولمادیغنی تعیین بعض کره چوق
مشکلدر . مشکلاتک نیدن عبارت اولدینی و ناصیل حل ایدلمک لازم کله چکی خصوصنده
یکی حقوق اصول محاکمه لری شرحزه مراجعت ماده : 237 نومرو 7 و متعاقب .